

**საჯარო სამართლის იურიდიული პირი –  
ბათუმის ხელოვნების სასწავლო უნივერსიტეტის  
წარმომადგენლობითი საბჭო**

---

ქ. ბათუმი

25 აპრილი, 2018 წელი

**გ ა დ ა წ ყ ვ ე ტ ი ლ ე ბ ა №05-01/01**

**სსიპ - ბათუმის ხელოვნების სასწავლო უნივერსიტეტის  
შინაგანაწესში ცვლილების შეტანის შესახებ**

საქართველოს ზოგადი ადმინისტრაციული კოდექსის 51-ე, 52-ე და 53-ე მუხლების, „უმაღლესი განათლების შესახებ“ საქართველოს კანონის 18-ე მუხლის პირველი პუნქტის ბ) ქვეპუნქტის, უნივერსიტეტის წესდების მე-17 მუხლის ბ) ქვეპუნქტისა და აკადემიური საბჭოს 2018 წლის 25 აპრილის №04-01/50 დადგენილების საფუძველზე

**წარმომადგენლობითმა საბჭომ გადაწყვიტა:**

1.სსიპ-ბათუმის ხელოვნების სასწავლო უნივერსიტეტის შინაგანაწესში შეტანილ იქნეს შემდეგი ცვლილება:

1.1. მე-2 მუხლის მე-3 პუნქტის „ზ“ ქვეპუნქტი ჩამოყალიბდეს შემდეგი რედაქციით:

„ზ) თამბაქოს მოწვევის აკრძალვასთან და მობილური ტელეფონით სარგებლობასთან დაკავშირებული წესები;“

1.2. მე-3 მუხლის მე-2 პუნქტის „ა“ ქვეპუნქტი ჩამოყალიბდეს შემდეგი რედაქციით:

„ა) მაღალკვალიფიციური და კონკურენტუნარიანი ბაკალავრის, მაგისტრის და პროფესიული განათლების მქონე პირების მომზადება;“

1. 3. მე-4 მუხლი ჩამოყალიბდეს შემდეგი რედაქციით:

**„ მუხლი 4. უნივერსიტეტის საქმიანობის სამართლებრივი საფუძვლები**

უნივერსიტეტი თავის საქმიანობას წარმართავს საქართველოს კონსტიტუციის, ზოგადი ადმინისტრაციული კოდექსის, სამოქალაქო კოდექსის, საგადასახადო კოდექსის, შრომის კოდექსის, უმაღლესი განათლების შესახებ საქართველოს კანონის, საქართველოს განათლებისა და მეცნიერების სამინისტროს, საქართველოს კულტურისა და სპორტის სამინისტროს კანონქვემდებარე აქტების, წინამდებარე შინაგანაწესისა და უნივერსიტეტის სტრუქტურული ერთეულების დებულებების საფუძველზე.“

1.4. მე-5 მუხლის მე-6 პუნქტის „ბ“ და „გ“ ქვეპუნქტები ჩამოყალიბდეს შემდეგი რედაქციით:

„ბ) რეესტრის წარმოებისა და დიპლომების განყოფილება;

გ) ადამიანური რესურსების მართვისა და საქმისწარმოების სამსახური;“

1.5. მე-5 მუხლის მე-6 პუნქტს დაემატოს შემდეგი შინაარსის „ვ“ ქვეპუნქტი:

„ვ) სტუდენტთა კარიერული მხარდაჭერისა და პრაქტიკის განყოფილება.“

1.6. მე-9 მუხლის პირველი პუნქტი ჩამოყალიბდეს შემდეგი რედაქციით:

„1. უნივერსიტეტის პერსონალს მიეკუთვნება: აკადემიური, მოწვეული სპეციალისტები/მასწავლებლები, ადმინისტრაციული და დამხმარე პერსონალი.“

1.7. მე-10 მუხლის პირველი-მე-3 პუნქტები ჩამოყალიბდეს შემდეგი რედაქციით:

„1. უნივერსიტეტის აკადემიურ პერსონალს მიეკუთვნება: პროფესორი, ასოცირებული პროფესორი, ასისტენტ-პროფესორი და ასისტენტი. პროფესორები მონაწილეობენ ან/და წარმართავენ სასწავლო და შემოქმედებით პროცესსა და მეცნიერულ კვლევებს. აკადემიური პერსონალის დატვირთვის ზღვრულ ოდენობას ამტკიცებს წარმომადგენლობითი საბჭო.

2. უნივერსიტეტის მასწავლებელთა პერსონალს მიეკუთვნება მასწავლებელი და უფროსი მასწავლებელი.

3. უნივერსიტეტის პროფესორი, ასოცირებული პროფესორი, ასისტენტ-პროფესორი და ასისტენტი არის კონკურსის შედეგად არჩეული და შესაბამის თანამდებობაზე რექტორის ბრძანებით დანიშნული აკადემიური თანამდებობის პირი.“

1.8. მე-10 მუხლის მე-5 და მე-6 პუნქტები ჩამოყალიბდეს შემდეგი რედაქციით:

„5. თეორიული მიმართულებით საგანმანათლებლო პროცესის საჭიროებიდან გამომდინარე შესაძლებელია სპეციალისტის (I და II კატეგორიის სპეციალისტი) მოწვევა.

I კატეგორიის სპეციალისტი უნდა აკმაყოფილებდეს შემდეგ კრიტერიუმებს:

ა) პირი, რომელსაც აქვს დოქტორის აკადემიური ან სამეცნიერო ხარისხი და უმაღლეს საგანმანათლებლო დაწესებულებაში მუშაობის არანაკლებ 3 წლის გამოცდილება;

ბ) გამონაკლის შემთხვევაში შესაძლებელია სპეციალისტად მოწვეული იქნას დოქტორანტი, რომელსაც აქვს არანაკლებ 3 წლის პედაგოგიური მუშაობის გამოცდილება.

II კატეგორიის სპეციალისტი უნდა აკმაყოფილებდეს შემდეგ კრიტერიუმს:

მაგისტრი ან მასთან გათანაბრებული აკადემიური ხარისხის მქონე პირი, გამონაკლის შემთხვევაში, როდესაც არ მოიძებნება შესაბამისი დარგის სპეციალისტი, შესაძლებელია მოწვეულ იქნას ბაკალავრის ან მასთან გათანაბრებული აკადემიური ხარისხის მქონე პირი.

## 6. საშემსრულებლო მიმართულებით

I კატეგორიის სპეციალისტი უნდა აკმაყოფილებდეს შემდეგ კრიტერიუმს:

უმალეს სახელოვნებო საგანმანათლებლო დაწესებულებაში მუშაობის არანაკლებ 3 წლის გამოცდილება ან სპეციალობით პრაქტიკული მუშაობის არანაკლებ 5 წლის გამოცდილება.

II კატეგორიის სპეციალისტი უნდა აკმაყოფილებდეს შემდეგ კრიტერიუმს:

სპეციალობის მიმართულებით პროფესიული ან შემოქმედებითი წარმატებების მქონე პირი.

კონკრეტმაისტერები გათანაბრებულია I კატეგორიის სპეციალისტთან“.

### 1.9. მე-14 მუხლის მე-5 და მე-6 პუნქტები ჩამოყალიბდეს შემდეგი რედაქციით:

„5. ვადაზე ადრე შრომითი ხელშეკრულების შეწყვეტის საფუძველია: პირადი განცხადება, შრომითი ხელშეკრულებით გათვალისწინებული პირობების დარღვევა, ეთიკის კოდექსისა და დისციპლინური პასუხისმგებლობის ნორმების უხეში ან სისტემატური დარღვევა, სასამართლოს მიერ გამოტანილი გამამტყუნებელი განაჩენის კანონიერ ძალაში შესვლა, პირის სასამართლოს მიერ შეზღუდულქმედუნარიანად აღიარება ან მხარდაჭერის მიმღებად ცნობა, მოქმედი კანონმდებლობით და უნივერსიტეტის წესდებით განსაზღვრული სხვა შემთხვევები.“

6. შრომის ხელშეკრულებები ინახება ადამიანური რესურსების მართვისა და საქმისწარმოების სამსახურში (შემდგომში-საქმისწარმოების სამსახური) სამსახური ხელშეკრულებებს აღრიცხავს სპეციალურ ჟურნალში.“

### 1.10. მე-15 მუხლის მე-2-მე-4 პუნქტები ჩამოყალიბდეს შემდეგი რედაქციით:

„2. უნივერსიტეტის ადმინისტრაცია ვალდებულია, შესაბამისი ფაკულტეტის წარდგინებითა და აკადემიური საბჭოს დადგენილების საფუძველზე საჯაროდ გამოაქვეყნოს განცხადება პროფესორის, ასოცირებული პროფესორის, ასისტენტ-პროფესორისა და ასისტენტის ვაკანტური თანამდებობების დასაკავებლად, საჭირო კვალიფიკაციისა და სხვა მოთხოვნების მითითებით. განცხადებაში გარკვევით უნდა იყოს ნაჩვენები და მითითებული კონკურსის პერიოდი და ვადები.

3.აკადემიური პერსონალის სამსახურში მიღების წესი და პირობები განისაზღვრება წარმომადგენლობითი საბჭოს მიერ დამტკიცებული „სსიპ - ბათუმის ხელოვნების სასწავლო უნივერსიტეტში აკადემიური თანამდებობების დასაკავებლად ღია კონკურსის ჩატარების წესით.

4. აკადემიური თანამდებობის დაკავების მიზნით გამოცხადებული კონკურსის საბოლოო შედეგების საფუძველზე გამოიცემა უნივერსიტეტის რექტორის შესაბამისი ბრძანება, კონკურსში გამარჯვებულ კანდიდატებს საქართველოს შრომის კანონმდებლობით განსაზღვრული წესით გაუფორმდებათ შრომითი ხელშეკრულებები, რის შემდეგ ისინი ჩაითვლებიან სასწავლო უნივერსიტეტის აკადემიურ პერსონალად (პროფესორებთან, ასოცირებულ პროფესორებთან, ასისტენტ-პროფესორებთან და ასისტენტებთან).“

1.11. მე-17 მუხლის მე-2 პუნქტი ჩამოყალიბდეს შემდეგი რედაქციით:

„2. პერსონალის თანამდებობიდან გათავისუფლების საფუძველია: პირადი განცხადება, შრომითი ხელშეკრულების ვადის გასვლა, შრომითი ხელშეკრულებით გათვალისწინებული პირობების დარღვევა, ეთიკის კოდექსისა და დისციპლინური პასუხისმგებლობის ნორმების უხეში ან სისტემატური დარღვევა, პირის სასამართლოს მიერ შეზღუდულქმედუნარიანად აღიარება ან მხარდაჭერის მიმღებად ცნობა, სასამართლოს მიერ გამოტანილი გამამტყუნებელი განაჩენის კანონიერ ძალაში შესვლა, მოქმედი კანონმდებლობით, სასწავლო უნივერსიტეტის წესდებითა და აღნიშნული შინაგანაწესით განსაზღვრული სხვა შემთხვევები.“

1.12. მე-18 მუხლის პირველი პუნქტი ჩამოყალიბდეს შემდეგი რედაქციით:

„1. უნივერსიტეტში სამუშაო დრო ადმინისტრაციული, აკადემიური და დამხმარე პერსონალისათვის განისაზღვრება 5-დღიანი სამუშაო კვირით, გარდა განსაკუთრებული შემთხვევისა პერსონალისათვის დასაშვებია 6 დღიანი სამუშაო კვირა, არა უმეტეს 40 საათისა კვირაში.“

1.13. მე-19 მუხლის მე-5 პუნქტი ჩამოყალიბდეს შემდეგი რედაქციით:

„5. უფროს მასწავლებელს/მასწავლებელს/მოწვეულ სპეციალისტს ანაზღაურებადი შვებულება ეძლევა იმ შემთხვევაში, თუ ეს გათვალისწინებულია შრომის ხელშეკრულებით და ხელშეკრულება დადებულია 11 თვეზე მეტი ვადით.“

1.14. 31-ე მუხლი ჩამოყალიბდეს შემდეგი რედაქციით:

**„მუხლი 31. თამბაქოს მოწვევის აკრძალვა**

1. „თამბაქოს კონტროლის შესახებ“ საქართველოს კანონის შესაბამისად, უნივერსიტეტის შენობაში/ტერიტორიაზე თამბაქოს მოწვევა აკრძალულია.

2. ამ მუხლით გათვალისწინებული მოთხოვნის დარღვევა გამოიწვევს პასუხისმგებლობას მოქმედი კანონმდებლობისა და უნივერსიტეტში დადგენილი წესის შესაბამისად.“

1.15. 32-ე მუხლი ამოღებულ იქნეს.

1.16. 37-ე მუხლის მე-6 პუნქტი ჩამოყალიბდეს შემდეგი რედაქციით:

**„6. სტუდენტის სტატუსის შეწყვეტის საფუძველებია:**

ა) სტუდენტის სტატუსთან შეუთავსებელი ქმედების განხორციელება, ეთიკის კოდექსის და ქცევის წესების უხეში დარღვევა, წინამდებარე შინაგანაწესით განსაზღვრული დისციპლინური დარღვევები;

ბ) შესაბამისი საგანმანათლებლო პროგრამის დასრულება;

გ) კანონმდებლობით დადგენილ ვადასა და უნივერსიტეტის მიერ დამატებითი სემესტრებისათვის განსაზღვრულ ვადაში საგანმანათლებლო პროგრამის დაუსრულებლობა;

დ) ერთი და იმავე სასწავლო კურსის: სპეციალობის საგნის ორჯერ და არასპეციალობის საგნის სამჯერ მოსმენა და კრედიტის ვერ მიღება;

ე) პირადი განცხადება;

ვ) გარდაცვალება;

ზ) კანონიერ ძალაში შესული გამამტყუნებელი განაჩენი განსაკუთრებით მძიმე დანაშაულის ჩადენისათვის, თუკი განაჩენის კანონიერ ძალაში შესვლიდან გასულია 5 წელი.

თ) სტუდენტის სტატუსის შეწყვეტასთან დაკავშირებული სხვა სამართლებრივი საკითხები წყდება მოქმედი კანონმდებლობითა და უნივერსიტეტის სამართლებრივი აქტებით დადგენილი წესით.“

1.17. მე-40 მუხლის „თ“ ქვეპუნქტი ჩამოყალიბდეს შემდეგი რედაქციით:

„თ) იცოდეს, რომ დაუშვებელია: საგანგებო სიტუაციის შექმნა ანდა საგანგებო სიტუაციების შესახებ ცრუ ინფორმაციის გავრცელება; აკრძალულია თამბაქოს მოწევა უნივერსიტეტის შენობაში და ტერიტორიაზე; უნივერსიტეტის შენობაში/ტერიტორიაზე ალკოჰოლური სასმელების შემოტანა, გავრცელება და მოხმარება; განზრახ, გაუფრთხილებლობით ან დაუდევრობით ისეთი ვითარების შექმნა ან ისეთი ქმედების ჩადენა, რომელიც საფრთხეს უქმნის უნივერსიტეტის მატერიალურ-ტექნიკურ ბაზას, უნივერსიტეტის ტერიტორიაზე მყოფი ადამიანების სიცოცხლეს, ჯანმრთელობას და უსაფრთხოებას;“

1.18. 41-ე მუხლის მე-2 პუნქტის „მ“ ქვეპუნქტი ჩამოყალიბდეს შემდეგი რედაქციით:

„მ) უნივერსიტეტის შენობაში/ტერიტორიაზე თამბაქოს მოწევა;“

1.19. 42-ე მუხლის მე-3 პუნქტის „თ“ ქვეპუნქტი ამოღებულ იქნეს.

1. 20. 45-ე მუხლის მე-4 პუნქტი ჩამოყალიბდეს შემდეგი რედაქციით:

„4. „თამბაქოს კონტროლის შესახებ“ საქართველოს კანონის შესაბამისად, უნივერსიტეტის შენობაში/ტერიტორიაზე მოწევა აკრძალულია. ამ შეზღუდვის დარღვევა გამოიწვევს პასუხისმგებლობას.“

1.21. 53-ე მუხლი ჩამოყალიბდეს შემდეგი რედაქციით:

#### **„მუხლი 53. საგანმანათლებლო პროგრამები**

უნივერსიტეტი ახორციელებს აკადემიურ და პროფესიულ საგანმანათლებლო პროგრამებს, ასევე მასწავლებლის მომზადების საგანმანათლებლო პროგრამას.“

1.22. 54-ე მუხლის პირველი პუნქტი ჩამოყალიბდეს შემდეგი რედაქციით:

„1. სასწავლო პროცესი უნივერსიტეტში მიმდინარეობს სასწავლო წლის განმავლობაში. სასწავლო წელი შედგება ორი სემესტრისაგან. სემესტრი საშუალოდ მოიცავს 19 სასწავლო კვირას, რომელთაგან 15 ეთმობა სალექციო, ხოლო 4 - საგამოცდო პერიოდს.“

1.23. 54-ე მუხლის მე-5 პუნქტი ჩამოყალიბდეს შემდეგი რედაქციით:

„5. სასწავლო პროცესის განხორციელება რეგულირდება სასწავლო პროცესების მარეგულირებელი წესით.“

1.24. 55-ე მუხლის პირველი პუნქტი ჩამოყალიბდეს შემდეგი რედაქციით:

„1. უნივერსიტეტში საქმისწარმოების წესი განისაზღვრება წინამდებარე შინაგანაწესითა და უნივერსიტეტის საქმისწარმოების ინსტრუქციით.“

1.25. 55-ე მუხლის მე-2 პუნქტი ამოღებულ იქნეს .

1.26. 56-ე მუხლის მე-3 პუნქტი ამოღებულ იქნეს.

2. გადაწყვეტილება, გარდა ამ გადაწყვეტილების პირველი პუნქტის 1.8 ქვეპუნქტისა, ძალაშია ხელმოწერისთანავე.

4. გადაწყვეტილების პირველი პუნქტის 1.8 ქვეპუნქტი ძალაში შევიდეს 2018 წლის 01 სექტემბრიდან.

**წარმომადგენლობითი საბჭოს  
სპიკერი**

**თ. მეიშვილი**